

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

13 Octobre 2017

(22 Muharram 1439 AH)

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « *Duahs (Partie 3)* » :

Par la grâce d'Allah, Allah (swt) pé donne moi sa l'occasion là pour contigner lors ene série de mo bane Khutba lor *duahs*, ki sa capave profite tous nous bane membres du Jamaat Ul Sahih Al Islam à travers le monde entier. Ki Allah (swt) contigner déverse So bénédiction lors moi et contigner révèle moi bane *duahs*, pour mo distribuer sa trésor spirituel là à tous mo bane disciples ki trouve à travers le monde entier, ki zot capave profite sa bane *duahs* là dans zot la vie de tous les jours, *Insha-Allah*.

Dépi commencement la Manifestation Divine en l'an 2000, pas mal de *duahs* Allah (swt) fine révèle moi pour reconforte moi dans plusieurs épreuves ki sa humble serviteur d'Allah fine passer et pé contigner passer et aussi mo bane disciples sincère pé passer, et nous, par la grâce d'Allah, Allah (swt) avec nous et pé révèle bane *duahs* et sa c'est en vérité bane z'armes ki extrêmement efficace et puissant pour bane croyants sincères.

Nous grand z'arme c'est *duahs* et azordi par la grâce d'Allah, mo contigner mette devant zot bane *duahs*, *duahs* ki Allah (swt) fine révèle moi et ki sa profite tous mo

bane disciples et aussi bane les autres frères et sœurs musulmans, parski sa c'est ene trésor spirituel ki mo là pour distribuer à zot tous, même zot croire dans moi ou zot pas croire, mais sa bane *duahs* là mo partage à zot tous pour ki sa apporte le salut, tranquillité, la paix dans sakaine parmi nous. Maintenant mo mette devant zot sa bane *duahs* là:

**Rabbana la tajalna dawmatal lil qawmil jaahileen.**

*Ô mo Seigneur, pas laisse nous vine ene bouchée dans la main de bane ki dominère.*

Et puis:

**Wajal afedatam menan-naase tahvee elayhim.**

*Faire beaucoup les cœurs dimounes tourner vers nous.*

Sa ene très bonne nouvelle pour le progrès. Ene l'exemple c'est ki devant ou lizié même comment Allah fine tourne les cœurs bane dimounes vers sa humble serviteur dans sa siècle là et guette nous site-web (website) par la grâce d'Allah, guette couma plusieurs pays, plusieurs peuples fine accepter sa humble serviteur et Jamaat Ul Sahih Al Islam. *Alhamdulillah-ir-Rabbil-Aalameen.*

Kan fine expulsé moi en dehors *Nizam-é-Jamaat* en l'an 2001 à cause la révélation divine même et bane attributs ki Allah (swt) fine montrer moi, et kot alors ene so-called Amir à sa l'époque là fine faire bane mauvais rapport rempli avec la haine et jalousie ki li ti ena et ki li fine manifester par envoie fausse rapport pour mette moi dehors, mais heureusement ki Allah (swt) fine reconforte moi avec sa bane *duahs* ki Li fine révèle à moi et guette couma sa *duah* là fine faire so l'impact kot ou pou trouver commié dimounes dans différent pays fine accepter sa humble serviteur là et kot Allah (swt) fine faire beaucoup les cœurs dimounes tourner vers moi comme le Khalifatullah de sa siècle là et le Jamaat ki Allah (swt) fine élève avec moi. *Alhamdulillah-ir-Rabbil-Aalameen.*

Par la grâce d'Allah, c'est ene très grand faveur divine sa ki tous sa bane pays là fine gagne le Jamaat Ul Sahih Al Islam kot fine accepter sa humble serviteur d'Allah là, mais aussi dans tous les pays nous Jamaat enregistrer officiellement, ene Jamaat d'Allah ki fonctionner légalement. Partout nous fonctionner légalement, pas illégalement. *Alhamdulillah.* Donc, par la grâce d'Allah tous nous bane membres du Jamaat Ul Sahih Al Islam dans différent pays pé propage le message de *Sahih al Islam*, malgré zot pé faire face beaucoup de persécutions, bane

épreuves bien difficile, mais zot pas jette z'arme, ni reculer, ni casse zot *Bai'at* ki zot fine faire lor la main sa humble serviteur d'Allah.

Donc, ene *duah* révéle ki mo pou mette devant mo bane très chers disciples:

**Rabbish hizni fa innal qawmat takhezonani sukra.**

*Ô mo Seigneur, protège moi contre sa peuple ki pé commence ridiculise moi là.*

En l'an 2001, kan cyclone de *Ribat* (médisance) ti pé tappe fort lors moi dans tous bane Masjid Ahmadiyya Maurice par sa ex so-called Amir là et so bane Mullahs, sa qualité zot ti pé ridiculise bane révélations ki mo ti pé recevoir, faire bouffon, faire mette boycott, pas faire *Salaam* et dans tous fonction familiale bizin pas invite moi et séki fine croire dans moi sinon pour prend sanction, pour mette dehors et tous sa là encore appliqué jusqu'à azordi par le présent Amir et so Managing Committee. A sa l'époque là, en l'an 2001, Allah (swt) révèle moi sa *duah* là:

**Rabbe areyni ayyatam menassama.**

*Ô mo Seigneur, montrer moi ene signe dépi lor le ciel.*

C'est-à-dire, avec sa bane signes ki Allah (swt) pour montrer moi là kot Allah (swt) pour donne l'honneur So serviteur choisi (sa humble serviteur là) et ensemble pour ena bane récompenses, et toute suite ene lotte *duah*:

**Areni zalzalatasa sa-ate.**

*Montré moi sa grand évènement ki fine promesse là.*

Ou sois nous capave traduire sa coumsa:

*Montrer moi ene vision de sa évènement là.*

Par la grâce d'Allah, Allah jamais fine néglige sa humble serviteur là et kot campagne pé batte plein dans Jamaat Ahmadiyya Maurice pou créer toute sorte la haine dans les cœurs de bane Ahmadi, kot zot dire ki révélation ki mo gagner fausse sa, kot zot fine même alle qualifié sa comme révélation satanique, *Nawzobillah min Zaalik*. Vraiment sa ti bien affecter moi. Avec beaucoup *duahs* lors saki zot fine dire, Allah (swt) révèle moi:

**Rabbe farriq bayna swadekin wa qaazebin anta taraa qulla muslehine wa swadekin.**

*Ô mo Seigneur, montrer la différence entre le vrai et le faux. To conne sak dimoune ki véridique et sak menteur.*

Fine dire dans sa morceau révéle-là, kot pé réfute parole de sa bane imbécile ki pé prend zot-même pour bane véridiques. Allah (swt) pé faire comprend dans sa *duah* là ki Mo (Moi, Allah) pou montrer la différence entre le vrai et le menteur. Donc, tellement zot ti pé aller avec bane paroles imbécile et humilier moi et traite moi partout ki mo ene menteur et toute suite sa *duah* vine lor mo la lèvre et Allah faire moi récite sa plusieurs fois:

### **Rabbe la toubkeni menaz ziadiz-zikra.**

*Ô mo Seigneur, pas quitte aucaine kitchose ki pour humilier moi.*

Donc, Allah (swt) fine rassure moi à travers sa *duah* là ki Li pas pou laisse nannié bane zaffaires ki pou humilier moi. Donc, kan ene messenger d'Allah vini, lerlà même ena le *Laila-tul-Qadr*, kot la Manifestation Divine manifester, kot ene la lumière du ciel apparaite pour éclairer les cœurs de bane chercheurs de vérité et ensam, ou pou trouve bane vrai hypocrites kot zot manifester zot vrai visage de la haine et jalousie, kot zot tourne les dos avec la Manifestation Divine avec bane complots pou rode teigne la lumière d'Allah, mais jamais zot pour capave teigne la lumière d'Allah. Zot souffle pou fini, zot la vie pour aller, Allah (swt) pour contigner perfectionne So la lumière.

Donc, péna différence entre zot et bane infidèles. Zot dans même catégorie ensam avec bane infidèles. C'est avec la venue d'ene messenger d'Allah ki ou pou alle conne bane vrai visage de bane hypocrites, infidèles kan zot vomi zot la haine et faire complots contre bane serviteurs d'Allah et lerlà ou trouve l'aide d'Allah vini kot Li amène zot vers zot destruction petit à petit sans ki zot réaliser, à travers zot dibien, zenfants, madames etc.

Donc, pour azordi, mo arrête là-même. *Insha-Allah*, Allah donne moi le *Tawfeeq* pour contigner la semaine prochaine. *Ameen*.

**O Allah, King of kings who reigns my heart,  
Give me the ring of honour,  
Such honour which shall sing Your praises,  
And abase Your enemies,  
And render this insignificant one significant in Your eyes,  
And in the eyes of Your sincere servants**

**Through Your Love and Mercy. Ameen.**

Traduction:

*O Allah, Roi des rois ki gouverne mo lé cœur,  
Donne moi bague de l'honneur,  
Ene tel l'honneur ki pou chante To louanges,  
Et ki pou humilier To bane l'ennemies,  
Et faire moi, sa dimoune ki pas ena aucaine l'honneur (ou valeur) là,  
Gagne l'honneur (ou valeur) dans To lizié,  
Et dans lizié de To bane serviteurs sincères,  
A travers To l'amour et To Miséricorde. **Ameen.***